



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

### 13. Kalenderwoche – ab 27. März 2011

## Nee, nee, nee...

Was in dor Weld dauornd so los is?! Eene Gadaschdrofe jaachd de näschsde!

Wensch da jedzde bloß ma an Schabahn denkn du...! Erschd de Dsunamie un dann de Adomgrafdwerge! Dor Subor-Gau!

Odor in Arabjen - wo ee Digidadohr nachm annorn geschdirzd wern soll... - obs wergrisch glabbn dud, weeiß mor ja noch gahr nisch. Abor erschdema is Offruhr, Mord un Dodschlach! Un besondersch dor Gadaffi, dor Beesewischd in Liebjen, dähr dud sisch währn bis offs Ledzde! Dähr dud de Machd eenfach nisch so ohne weidores abgähm. An währn denne ooch?

Es is sin ja bis jedzde bloß Offschdändische da... - abor fiehr so e Land da brauchdsde ooch Anschdändische, die dann dähn ganz Reischduhm nisch ooch widdor bloß unnor sisch vordeeln dun. Das Eel nähmlisch! Daderdrum duds ja gehn!

Un bei uns in Deudschland hammor die Gadaschdrofe mid dähm neun Benziehn - E10! Wobei das geschniebor von Schabhan un Liebjen fasd e bißl ins Hindordreffn komm dud. Weil ehm ooch... - durch E10 hads noch nisch een Dodn gegähm!

Un wenn de Dsunamie in Schabahn e baar Daache ehor gekomm sein däde, dann hädde villeischd dor Freiherr von un zu Guddnbersch gahr nisch zuriggdrähnd missn. De Dsunamie hädde doch das bißl Dheador mid dähm Dogdohrhud gladd in dähn Rinnschdeen geschbield!

Nee, wemmor das vorgleischn dud... dord de Weld un hier e eidlor Adlischor, dähr nisch rischdisch offgebassd had, was sei Gosdwreidor... also, sei bezahldor Schreiberling... was dähr gemachd had. Dähr faule Hund... also, dähr Schreiberling!... had wahrscheinlich ehm eenfach e bißl was abgeschriem, wollde abor das volle Honorar ham vom Guddnbersch. Wenn dor Guddnbersch gewussd hädde, dasss dähr bloß abgeschriehm had... das häddor dann ooch selbor machn kenn!

Nee, schade dass de Dsunamie erschd so schbäd gekomm is. Sonsd häddn mir immor noch een in dor Regierung, dähr ma bißl was hährmachn dud. Eenor, wo de gedachd hasd, dähr is werglisch e bißl was Besondersch! Ehm e eschdor Adlischor - wo de offschaun kannsd! Nisch so e hährge loofnor Brolledarjor, dähr annerschw o keene Arbeit gefundn had.

Ja, un so häng ehm die ganz großn un ganz schlimm Ereischnisse in dor Weld ooch mid die kleen un schlimm Ereischnisse bei uns irschendwie zusamm. Jednfalls ehm iebor de Medijen!

De Medijen grischn ja werglisch alles raus! Die ham ja ooch widdor schon een Daach vorhähr gewussd, dass dor Felix Maggad zurigg zu Wolfsbursch gehn dud un dor Heeneß dord nausflieschd. Ooch dass dor Rangnigg widdor zu Schalge gehn dud, hamm de Medijen schon gewussd, bevors dor Rangnigg selbor wussde. De Medijen ham so eene Ard Vorwarnsysdehm. Schade ehm, dass das bei Dsunamies un annre Naduhrgadaschdrofn nisch glabbn dud. Bei dor Naduhr dun ehm de Informandn fähln, die schon vorhähr e bißl was durschsiggorn lassn.

**Eduard Sachsenmeyer**